

四庫全書

史部

# 欽定四庫全書

史部

文獻通考卷二百七十八

詳校官內閣學士

臣瑞保

編修臣程嘉謨覆勘

覆校官中書臣孫希旦

校對官中書臣金光悌

謄錄監生臣王頌修

欽定四庫全書

文獻通考卷二百七十八

鄱陽馬端臨

貴與著

象緯考一

中宮三垣

漢天文志曰凡天文在圖籍昭昭可知者經星常宿中外官凡一百十八名積數七百八十三星皆有州國官宮物類之象其伏見早晚邪正存亡虛實澗厓

孟康曰伏見早

晚謂五星也日月五星下道為邪存謂列宿不虧也亡謂恒星不見虛實若天牢星實則因多虛則開出之屬

也濶匿若三台及五星所行合散犯守陵歷闕食孟康曰合

星相去遠近也同舍也散五星有變則精散為祿星也犯五寸以內光芒相及也陵相冒過也食星月相凌不見者則所食也

章昭曰自下往觸之曰犯居其宿曰守守彗字飛流日月

薄食張晏曰彗所以除舊布新也字氣似彗飛流謂飛

月無光曰薄京房易傳曰日月赤黃為薄或曰不暈適交而食曰薄章昭曰氣往迫之為薄虧毀曰食也暈適

背穴抱珥蛭蜺孟康曰皆日旁氣也適日之將食先有

形如玉鐫也抱氣向日也珥形點黑也如淳曰暈讀曰運蛭或作虹蜺讀曰蜺蟬謂之蛭表云雄為蛭雌為

蛇凡氣在日上冠為戴在旁直對為珥在旁如半環向日為抱向外為背有氣刺日為鏑鏑挾傷也迅雷

風祆怪雲變氣此皆陰陽之精其本在地而上發於天

者也政失於此則變見於彼猶景之象形鄉之應聲

師古

曰鄉讀曰響

是以明君觀之而寤飭身正事思其咎謝其過

則禍除而福至自然之符也

晉天文志曰張衡云文曜麗乎天其動者有七日月五星是也日者陽精之宗月者陰精之宗五星五行之精衆星列布體生於地精成於列列居錯峙各有攸屬在

野象物在朝象官在人象神其以神差有五列焉是為三十五名一居中央謂之北斗四布於方各七為二十八舍日月運行歷示吉凶五緯躔次用告禍福中外之官常明者百有二十四可名者三百二十為星二千五百微星之數蓋萬一千五百二十庶物蠢蠢咸得繫命不然何得總而理諸後武帝時太史令陳卓總甘石巫咸三家所著星圖大凡二百八十三官一千四百六十四星以為定紀今畧其昭昭者以備天官云

中宮

北極紫微宮

中元北極紫微宮北極五星在其中大帝之座第二珠  
第三之宮庶子居第一號曰為太子四為后宮五天樞

一云第三明者帝之居第四明  
曰四庶子最小第五天之樞

左右四星是四輔天一

太一當門路左樞右樞夾南門兩面營衛一十五上宰  
少尉兩相對少宰上輔次少輔上衛少衛次上丞後門  
東邊大贊府門西喚作一少丞以次却向門前數陰德

門裏兩黃聚尚書以次其位五女史柱史各一戶御女  
四星五天柱大理兩星陰德邊勾陳尾指北極顛勾陳  
六星六甲前天皇獨在勾陳裏五帝內座後門是華蓋  
并杠十六星杠作柄象華蓋形蓋上連連九箇星名曰  
傳舍如連丁垣外左右各六珠右是內階左天廚階前  
八星名八穀廚下五箇天梧宿天床六星左樞在內廚  
兩星右樞對文昌斗上半月形希疎分明六箇星文昌  
之下曰三公太尊只向三公明天牢六星太尊邊太陽



之守四勢前一箇宰相太陽側更有三公相西邊即是

元戈一星圓天理四星斗裏暗輔星近著開陽淡

一本云文

昌之下三師名天牢六星四勢前更有二公相西偏即是太陽一星圓天理四星斗裏暗輔星近著開陽淡

北斗之星七宿明第一主帝名樞精第二第三璇璣是第四名權第五衡開陽搖光六七名

北極五星在紫微宮中一名天極一名北辰其紐星

天之樞也天運無窮三光迭耀而極星不移故曰居

其所而衆星共之第一星主月太子也第二星主日

帝王也亦為太乙之座謂最赤明者也第三星主五星庶子也北極五星最為尊也中星不明主不用事右星不明太子憂也其第四星為后宮第五星為天樞張衡云二星並為後宮北極五星明大則吉變動則憂抱極樞四星曰四輔所以輔佐北樞而出度受政也張衡云抱極之細星也為輔臣之位主贊萬機小而明吉大明及芒角臣逼君暗則官不理天乙一星在紫宮門右星之南天帝之神也主戰鬪知人吉

凶者也太乙一星在天乙南相近亦天帝神也主使  
十六神知風雨水旱兵革饑饉疾疫災害所生之國  
也張衡云天乙逼闔闔外其占明而有光則陰陽和  
合萬物成人主吉不然反是太乙占與天乙畧同紫  
微垣十五星其西蕃七東蕃八在北斗之北一曰紫  
微大帝之座也天子之常居也主命主度也一曰長  
垣一曰天營一曰旗星為藩衛備藩臣也宮闕兵起  
旗星直天子出自將宮中兵張衡云紫微垣十五星

東藩八西藩七其東藩近閭闔門第一星為左樞第二星為上宰第三星為少宰第四星為上輔第五星為少輔第六星為上衛第七星為少衛第八星為少丞其西藩近閭闔門第一星為右樞第二星為少尉第三星為上輔第四星為少輔第五星為上衛第六星為少衛第七星為少丞皆以明大有常則吉若盛明則內輔盛也宮垣直而明天子將兵開則兵起西藩開如門象名閭闔門有流星自門而出四野者當

有中使銜命視其所適野而諭之也陰德二星在紫微宮內尚書之西主施德者其占以不明為宜明則新君踐極隋志曰尚書西二星曰陰德陽德主周急振撫又分為二坐星矣門內東南維五星曰尚書主納言夙夜咨謀龍作納言此之象也張衡曰八座大臣之象其占與四輔不殊極東一星曰柱下史主左右記君之過星明則史直辭不明反是柱史北一星曰女史婦人之微者主傳漏故漢有侍史張衡云婦

官也主記宮中之事其占與柱史同御女四星在紫微宮內勾陳之北八十一御妻之象也其占明則多內寵不明則否晉志謂之女御宮天柱五星在紫微宮門內華蓋杠左旁近東垣北隅法五行主晦朔晝夜之職明正則吉人安陰陽調不然則司厯過隋志云建政教立圖法之府也常以朔望日垂禁令於天柱以示百司周禮以正歲之月示法象魏此之謂也大理二星在紫微門內次近陰德決獄之官星明則

刑憲平不明則冤酷深勾陳六星在紫微宮華蓋之下隋志云後宮也大帝之正妃也大帝之常居也張衡云大帝所居之宮也亦將軍之象也星明則吉暗則人主惡之勾陳口一星曰天皇大帝其神曰曜魄寶主御羣靈兼萬機神圖也其星隱而不見則為災六甲六星在紫微宮內華蓋杠左旁分掌陰陽紀時節明則陰陽和不明則寒暑易節五帝內座五星在華蓋下勾陳上斧宸之象所以備宸居者明正則吉

變動則災凶隋志云客星犯紫微宮中座大臣犯主  
華蓋七星其杠九星合十六星在勾陳上正當大帝  
所以覆蔽大帝之座也明正則吉傾動則凶傳舍九  
星在華蓋上近河賓客之館主胡人入中國客星守  
之備姦使亦曰胡兵起內階六星在文昌北天皇之  
陛也明吉傾動凶紫微東垣北維外六星曰天厨天  
子百官之厨也見吉不見凶八穀八星在紫微西藩  
之外五車之北其八星一主稻二主黍三主大麥四



主小麥五主大豆六主小豆七主粟八主麻子明則  
八穀皆成暗則不熟一星不見則八穀不登八星不  
見則國人糊口天棊五星在女床東北天子先驅所  
以禦難也不明則國兵起一曰主爭訟明大凶小吉  
天床六星當閭闔門外主天子寢舍解息燕休之處  
星正大吉君有慶傾則人主不安一云在宮門外聽  
政之象也為寢舍也暗凶內厨兩星在紫微垣外西  
南角主六宮之內飲食府也一云主后夫人與太子

飲晏居常無咎有犯守凶文昌六星在北斗魁前天  
之六府也主集計天道一曰上將大將軍建威武次  
二曰次將尚書正左右三曰貴相太常理文緒四曰  
司祿司中司隸賞功進爵五曰司命司怪太史主滅  
咎六曰司寇大理佐理寶所謂一者起北斗魁前近  
內階者也明潤大小齊天瑞臻張衡云其占黃潤光  
明萬人安大小均天瑞降青黑細微多所害搖動移  
徙大臣憂金火守入兵興孛犯國亂一曰文昌動則

三公受誅后崩災福與三公同三公三星在北斗柄  
東又三公星在北斗魁西並為太尉司空司徒之象  
主燮理陰陽弼君機務其星移徙不吉居常安金火  
守之三公有凶隋志曰杓南三星及魁第一星皆曰  
三公宣德化調七政和陰陽之官也太尊一星在中  
台之北貴戚也巫咸云聖公之象居常為定不見則  
凶金犯守為災貴賤將敗者也天牢六星在北斗魁  
下貴人之牢也主愆過禁暴淫與貫索同占太陽守

一星在相西大將大臣之象也主戒不虞設武備也  
非其常兵起明吉暗凶移徙大臣誅勢四星在太陽  
西北刑餘人而用事者也不明吉明即閹官擅權相  
一星在北斗南隋志曰相者總領百官而掌邦教以  
佐帝王安邦國集衆事也明吉元戈一星在招搖北  
一曰天戈也芒角大而動則四夷兵起其占與梗河  
相類北斗魁中四黑星為貴人之牢曰天理明及搖  
動與有星者為貴人下獄北斗七星輔一星在太微

北七政之樞機陰陽之本元也故運乎天中而臨制  
四方以建四時而均五行也魁四星為璇璣杓三星  
為玉衡又象號令之主又為帝車取乎運動之義也  
又魁第一星曰天樞二曰璇三曰璣四曰權五曰玉  
衡六曰開陽七曰搖光一至四為魁五至七為杓樞  
為天璣為地璣為人權為時玉衡為音開陽為律搖  
光為星石氏云第一曰正星主陽德天子之象也二  
曰法星主陰刑女主之位也三曰令星主禍害也四

曰伐星主天理伐無道五曰殺星主中央助四旁殺  
有罪六曰危星主天倉五穀七曰部星亦曰應星主  
兵又云一主天二主地三主火四主水五主土六主  
木七主金又曰一主秦二主楚三主梁四主吳五主  
趙六主燕七主齊輔星附乎開陽所以佐斗成功也  
又曰主危正矯不平又曰丞相之象也七政星明則  
國昌不明則國殃斗旁欲多星則安斗中少星則人  
怨上天下多訟法者無星二十日有輔星明而斗不

明臣強主弱斗明輔不明主強臣弱也杓南三星及  
魁第一星皆曰三公宣德化調七政和陰陽之官也  
張衡云若廣營宮室妄鑿山陵則第二星不明或變  
色若不愛百姓聚興征役則第三星不明或變色若  
發號令不明四時不明天道則第四星不明或變色  
若廢正樂務淫聲則第五星不明或變色若不勸農  
桑不務稼穡峻法濫刑退賢傷政則第六星不明或  
變色若不撫四方不安夷夏則第七星不明或變色

凡日月暈連環及斗月暈及搖動兵起其傍側中小星多則天下不安人多怨一云小星多則天下安不然則國人散五曜及客星守入皆凶字彗尤甚也

右夾漈鄭氏作通志天文略言漢晉諸志所載諸星名數災祥叢雜難舉惟隋丹元子作步天歌句中有圖言下見象或豐或約無餘無失故特取其歌而於歌之後採諸家之言以備之今所載其前則丹元子歌也後則夾漈所取諸志以釋之者也



其說亦略備矣然宋史志所載近代諸儒之說則  
考訂尤詳故又撫其所未備者附見各段之末云  
宋兩朝天文志舊說皆以紐星正樞機後祖暅之立  
儀測之洎皇祐中以銅儀管候之其不動處猶在樞  
星之末一度餘

朱子語錄曰北辰乃天之北極天如水車北辰乃  
軸處水車動而軸未嘗動 又曰北辰是那中間  
無星處些子不動是天之樞紐北辰無星緣人要

取此為極不可無箇記認所以就其旁取一小星  
謂之極星問極星動否曰極星也動只是近那辰  
後雖動而不覺今人以管去窺那極星見其動來  
動去只在管裡面不動出去向來人說北極便是  
北辰皆只說北極不動至本朝人方去推得是北  
極只在北辰邊頭而極星依舊動

宋兩朝天文志太子星去北極十五度入心宿三度  
四輔四星去天樞各四度 勾陳六星去極六度

半入壁宿五度 天皇大帝星去極八度半入室宿  
十一度 華蓋七星杠九星距中大星去極二十六  
度入婁宿四度 五帝內座五星距中大星去極十  
二度半入室宿六度 六甲六星距南星去極一十  
五度入奎宿四度 御女四星距西南星去極一十  
三度半入奎宿一度 天柱五星距東南星去極十  
三度半入危宿初度 尚書五星距西南星去極一  
十九度入尾宿十四度 柱下史一星去極十八度

入斗宿十三度 女史一星去極十七度半入斗宿  
二度 陰德二星距東星去極十九度入房宿二度  
大理二星距東星去極二十三度半入心宿五度  
天床六星距西南星去極二十二度入氐宿二度  
半 紫微垣十五星其左驂樞去極二十七度半入  
房宿一度 右驂樞去極二十一度入亢宿八度  
天乙一星去極二十度半入亢宿一度半 太乙一  
星去極二十一度入亢宿一度 內廚二星距西南

星去極十九度半入軫宿十一度 天廚六星距大  
星去極二十四度入井宿二十二度 內階六星距  
西南星去極二十三度入井宿二十六度 八穀八  
星距西南星去極三十一度半入畢宿三度 傳舍  
九星距西第四星去極二十八度半入胃宿五度  
閣道六星距南星去極四十八度入奎宿四度半  
策一星去極三十三度半入壁宿五度 鈎九星距  
大星去極二十四度入危宿初度 扶筐七星距南

第一星去極三十二度半入斗宿六度 北斗七星  
天樞去極二十三度半入張宿十度搖光去極三十  
五度入角宿九度 輔一星去極三十度入角宿三  
度 天理四星距東南星去極二十八度入翼宿九  
度 三公三星距東星去極三十五度少入角宿六  
度 三師三星距西星去極二十一度入張宿初度  
半 文昌六星距西南星去極三十四度半入柳宿  
二度半 天牢六星距西北星去極二十八度半入

張宿六度 天相一星去極三十三度入軫宿四度  
勢四星去極三十一度入翼宿二度 天槍三星  
距大星去極三十二度半入氐宿初度 天棓五星  
距南星去極四十四度入箕宿三度

先公曰古今志天文者述天官星之名義大略皆  
同兩朝志亦出入晉隋二史但此能言其去極若  
千度某宿若干度為異耳

宋中興天文志坎正北方也北極不於坎乾而於艮

丑以艮東北萬物之所成終而所成始也作歷者逆  
推而上之以至於數千百載必得日月合璧五星連  
珠於建牛之次然後用之為歷元謂建牛艮丑分野  
萬物成終成始之地也故北極則居其方為天之極  
而七政則會其分為歷之元當七政會其分之時亦  
必纏運適當其方次天道自然知者鮮矣此其辨之  
一曰北極第二星最赤明者星圖謂之帝而勾陳口  
中又為天皇帝非是按巫咸通元經寶鏡圖北極



五星勾陳六星在紫極宮中柰宮一而帝二也此當  
辨曰賈逵張衡蔡邕王蕃陸績皆以紐星為不動處  
晉志謂北辰為最尊者是也孔子曰譬如北辰居其  
所而衆星共之言於天象為至尊是於五星為第一  
而志反以第五倒置之甚此當辨夫不以紐星之居  
其所衆星共者為帝而以從極之赤明者為帝則異  
乎吾孔子所云此當辨北辰一星不為帝而指勾陳  
口中星為天皇帝豈居其所非大而不居其所為

大乎口中一星即大帝之座不當遂指為天皇大帝  
遂以為耀魄寶此當辨志曰北極五星其紐星天之  
樞也第一星主月太子也第二星主日帝王也亦太  
乙之座謂最赤明者也第三星主五星庶子也非是  
按大象列星圖亦以一為太子二為帝王三為庶子  
而餘星則以為後宮乾象新書所載傳言亦以一主  
月為太子二主日為帝王而三則以為主五行四則  
以為主諸王五則以為主庶子核其說皆非是而未

暇辨所辨者日月五星各分所主而非其義也藉令  
必有所主則主者惟帝耳太子何得分主月庶子又  
何得分主五星而帝乃獨主日乎此當辨天官書前  
漢志及春秋合誠圖曰中宮天極星其一明者太乙  
常居旁三星三公或曰子屬後勾四星末大星正妃  
餘三星後宮之屬也孝經援神契曰辰極橫后妃四  
星從端大妃光明二說大略相類然考之經觀之象  
則指三星為三公固不可而又以三星為子屬尤不

可且既以為三公又以為子屬何自二其說乎子屬  
即旁二星耳太子一庶子一豈又有子屬乎宮南三  
星曰三公內座杓南三星及魁上三星曰三公三孤  
後豈此又有三公乎所謂後勾四星勾曲抱極志謂  
四輔星也則言末大星正妃餘三星後宮之屬者與  
言后妃四星從端大妃光明者皆非是此當辨夫以  
四輔末大星為妃者固非是而志則曰勾陳後宮也  
大帝之正妃也亦非是勾陳實主六軍大司馬巫咸

曰主天子護軍即不當以為後宮又不當以為正妃  
此當辨曰然則北極五星之辨如何聞之師云天樞  
紐星在四輔中者是為天皇大帝其神曰耀魄寶此  
是也而彼所指勾陳中一星為耀魄寶者非也故初  
一曰帝次二曰后次三曰妃次四曰太子乃其赤明  
者也次五曰庶子因知中宮帝當以孔子所稱北辰  
為据其精北極星其神耀魄寶太公望閼天書不誣  
此其辨之二

又曰極星之在紫垣萬神所宗七曜三垣二十八宿衆星所拱是北極為天文之正中而自唐以來厯家以儀象考測則中國南北極之正實去極星之北一度有半此蓋中原地勢之度數也

中興更造渾儀而太史局令丁師仁言臨安府地勢向南於北辰極高下當量行移易局官呂璨言渾天無量行更易之制若用於臨安與天參合移之他往必有差忒於此罷議後十餘年邵諤鑄儀則果用臨

安北極高下為之以今清臺儀校之實去極星四度  
有奇焉若列星諸宿去極之度數與赤道之遠近則  
清臺一遵皇祐所測無所更易舊史已具茲不復言  
太微宮

上元太微宮昭昭列象在蒼穹端門只是門之中左右  
執法門西東門首皂衣一謁者以次即是烏三公三黑  
九卿公背傍五黑諸侯卿後行四箇門西主軒屏五帝  
內座於中正幸臣太子并從官烏列帝後從東定郎將

虎賁居左右常陳郎位居其後常陳七星不相誤郎位陳東一十五兩面宮垣十星布左右執法是其數宮外明堂布政宮三箇靈臺候雲雨少微四星西南隅長垣雙雙微西居北門西外接三台與垣相對無兵災

太微垣十星在翼軫北張衡云天子之宮庭五帝之座十二諸侯府也其外蕃九卿也一曰軒轅為權太微為衡衡主平也隋志云又為天庭理法平辭監升授德列宿受符諸神考節舒情稽疑也南蕃中二星



間曰端門東曰左執法廷尉之象也西曰右執法御史大夫之象也執法所以舉刺凶奸者也左執法之東左掖門也右執法之西右掖門也東蕃四星南第一曰上相其北東太陽門也第二星曰次相其北中華東門也第三星曰次將其北東太陰門也第四星曰上將所謂四輔也西蕃四星南第一星曰上將其北西太陽門也第二星曰次將其北中華西門也第三星曰次相其北西太陰門也第四星曰上相亦四

輔也東西蕃有芒及動搖者諸侯謀天子也執法移則刑罰尤急月五星入太微軌道吉其所犯中座成刑謁者一星在太微內在執法東北主贊賓客也不見外國不賓服謁者東北三星曰三公內座朝會之所居也張衡云以輔弼帝者其名與夾斗三公同三公北三星曰九卿內座主治萬事與天紀同占九卿西五星曰內五諸侯內侍天子不之國也辟雍之禮得則太微諸侯明屏四星在端門內帝座南近右執

法屏所以擁蔽帝庭也執法主刺舉星明潤則君臣有禮黃帝內座一星在太微中含樞紐之神也天子動得天度止得地意從容中道則太微五帝之座明以光黃帝座不明人主當求賢士以輔治不然則奪勢又曰太微五帝座小弱青黑天子國亡四帝內座四星夾黃帝座東方星蒼帝靈威仰之神也南方星赤帝赤熛怒之神也西方星白帝白招矩之神也北方星黑帝叶光紀之神也張衡云五帝同明而光則

天下歸心不然則失位金火水入太微若順入軌道  
伺其出之所守之分則為天子所誅也帝座東北一  
星曰幸臣主親愛臣明則幸臣用事微細吉太子一  
星在幸臣西五帝座北儲貳之星明而潤則太子賢  
不然則否金火守入太子不廢則為篡逆之事從官  
一星在太子西北主從官不見則帝不安如常則吉  
郎將一星在郎位東北所以為武衛張衡云今左右  
中郎將是也大明芒角將恐不可當也虎賁一星在

太微西蕃之外上相之西下台之南靜室旄頭之騎  
官也張衡云主侍從之武臣也與車騎同占常陳七  
星如畢狀在郎位北天子宿衛虎賁之士以設強毅  
也星搖動天子自出明則武兵用微則兵弱郎位十  
五星又云二十四星在帝座東北一曰依烏郎位也  
周官之元士漢官之光祿中散騎諫議議郎三署郎  
中是其職也張衡云今之尚書郎也欲其大小相均  
光潤有常吉隋志郎位主守衛也其星明大臣有劫

主又曰客犯上其星不具后死幸臣誅客星入之大  
臣為亂明堂三星在太微西南角外天子布政之宮  
也明吉暗凶明堂西三星曰靈臺主觀雲物察符瑞  
候災變也占與司怪同少微長垣二座星已釋在張  
星之次矣三台六星兩兩而居起文昌列招搖太微  
一曰天柱三公之位也在天曰三台主開德宣符也  
西近文昌二星曰上台為司命主壽次二星對軒轅  
曰中台為司中主宗室東二星抵太微曰下台為司

祿主兵所以昭德塞違也又曰三台為天階太乙躡  
以上下一曰泰階上階上星為天子下星為女主中  
階上星為諸侯三公下星為卿大夫下階上星為士  
下星為庶人所以和陰陽而理萬物也其星有變各  
以所主占之君臣和集如其常度張衡云色齊明而  
行列相類則君臣和法令平不齊為乖度金火守入  
兵起彗孛尤甚也

宋兩朝天文志太微十星右執法去極八十四度入

翼宿十二度半左執法去極八十六度入軫宿初度  
半 謁者一星去極八十三度入軫宿一度 三公  
三星距東星去極八十四度半入軫六度 九卿三  
星距西北星去極七十五度入軫七度 內五諸侯  
五星距西星去極七十度入軫一度 五帝座五星  
距中大星去極七十一度半入翼十一度 屏四星  
距西南星去極八十度入翼十度 太子一星去極  
六十六度半入翼十一度半 從官一星去極六十



四度半入翼八度半 幸臣一星去極六十六度半  
入翼十五度 郎位十五星距西南星去極六十度  
入翼十八度 郎將一星去極四十七度半入軫十  
一度 常陳七星距東星去極五十一度半入軫初  
度 虎賁一星去極六十二度少入翼二度

宋中興天文志曰太微垣有五帝座五帝內座又列  
乎紫宮何也曰五帝常居在太微而入覲乎紫宮故  
有內座也然則五帝何帝也此志所謂靈威仰赤熒

怒含樞紐白招矩叶光紀之神也有天皇矣而又有  
五帝何也五帝在天主五行在地主五嶽分方主事  
以輔天皇者昔周公郊祀后稷以配天斯北極紫微  
中宮天皇大帝也而宗祀文王於明堂以配上帝則  
宮南太微五帝也此月令明堂所以分五宮祀五帝  
也

天市垣

下元一宮名天市兩扇垣牆二十二當門六角黑市樓

門左兩星是車肆兩箇宗正四宗人宗星一雙亦依次  
帛度兩星屠肆前候星還在帝座邊帝座一星常光明  
四箇微茫宦者星以次兩星名列肆斗斛帝前依其次  
斗是五星斛是四垣北九箇貫索星索口橫者七公成  
天紀恰似七公形數著分明多兩星紀北三星名女牀  
此座還依織女傍三光之象無相侵二十八宿隨其陰  
水火木土并與金以次別有五行吟

天市垣二十二星在房心東北主權衡主聚衆一曰

天旗庭主斬戮之事也市中星衆潤澤則歲實星希則歲虛熒惑守之戮不忠之臣又曰若怒角守之者臣殺主彗星出為徙市易都客星入之兵大起出之有貴喪張衡云天市明則市利急商人無利忽暗則反是市樓六星在市中臨箕星之上主司闕闕明則吉暗則市利不理也隋志市樓者市府也主市價律度其陽為金錢其陰為珠玉變見各以所主占之車肆二星在天市垣南門之內主車駕不明則國車盡

行隋志主衆賈之區宗正二星在帝座東南宗大夫也彗星守之若失色宗正有事客星守動則天子親屬有變又曰客星守之貴人死又曰宗正明則宗室有秩暗則國家凶宗人四星在宗正東主錄親疎享祀如綺而明正族人有序宗星二星在宗人東北候星之東宗室之象帝輔血脉之臣也客星守之宗人不和帛度二星在宗室星東北主度量明則尺量平商人不欺暗則否屠肆二星在帛度東北主烹宰明

大則肆中多宰殺候一星在帝座東北主伺陰陽也  
明大則輔臣強四夷開候細微則國安亡則主失位  
移則主不安居常則吉帝座一星在天市中候星西  
天庭也光而潤則天子吉威令行微細凶大人當之  
或云暗則大人不正張衡云帝座者帝王之座帝座  
有五一座在紫微宮一座在大角一座在心中一座  
在天市垣一座在太微宮咸云帝座一曰神農所居  
不見則大人當其咎宦者四星在帝座西南帝傍之

闔人也星微則吉明則凶非其常宦者有憂其占與  
勢星同列肆二星在斛西北主寶玉之貨移徙則列  
肆不安火守入兵大起斗五星在宦者西南主平量  
覆則歲熟仰則大饑明暗與帛度同斛四星在市樓  
北亦曰天斛主量者也占與斗同貫索九星在七公  
前一曰連索一曰連營一曰天牢主法律禁暴強也  
牢口一星為門欲其開也九星皆明天下獄煩七星  
見小赦五星見大赦動則斧鑕用中空則更元漢志

云十五星張衡云貫索開有赦不見則形獄簡若閉  
口及星入牢中有繫死者常以午子夜候之一星不  
見則有小喜二星不見賜祿三星不見人主德令行  
且赦若客星出視其小大大有大赦小有小赦或云  
貫索為賤人之牢一星芒有喜事二星芒賜爵祿三  
星芒有赦門閉牢中多死水犯災火犯米貴七公七  
星在招搖東天之相也三公之象張衡云七公橫列  
貫索之口主執法列善惡之官也星齊正則國法平



差戾則獄多冤酷或云星入河米貴火犯之兵起天  
紀九星在貫索東九卿也為九河主萬事之紀理冤  
訟也明則天下多詞訟亡則政理壞國紀亂散絕則  
地震山崩女床三星在天紀之北為後宮御女主女  
事明則宮人恣意常則無咎

宋兩朝天文志天市垣二十二星東西列各十一星  
其東垣南第一星曰宋第二星曰南海第三星曰燕  
第四星曰東海第五星曰徐第六星曰吳越第七星

曰齊第八星曰中山第九星曰九河第十星曰趙第三  
十一星曰魏其西垣第一星曰韓第二星曰楚第三  
星曰梁第四星曰巴第五星曰蜀第六星曰秦第七  
星曰周第八星曰鄭第九星曰晉第十星曰河間第  
十一星曰河中 東垣南第一星宋去極一百五度  
半入危宿七度 西垣第一星韓去極九十八度半  
入心宿五度 市樓一星距東南星去極九十八度  
入尾宿十二度 車肆二星距西大星去極一百度

入尾宿三度 斛四星距西南星去極八十七度半  
入尾宿三度 列肆二星距東星去極八十六度入  
心宿三度半 帝座一星去極七十五度入尾十度  
候一星去極七十八度半入尾十六度 宦者四  
星距南星去極七十六度半入尾九度半 斗五星  
距東大星去極七十九度入尾六度半 宗正二星  
距北星去極八十五度半入尾十六度 宗人四星  
距大星去極八十六度入箕一度 宗室二星距北

大星去極八十度半入箕五度 帛度二星距西星  
去極六十九度少入箕三度 屠肆二星距西星去  
極六十八度半入箕宿三度

宋中興天文志天市垣中一星明大者謂之帝座帝  
座東北一星為后舊誤作候西南三星為妃舊失其  
位妃北一星在帝右后北一星在帝左是為左右常  
侍妃南四星為宦寺宦寺南一星為閹人閹人南四  
星為內屏此其別也而舊乃以右常侍一星及妃三

星為宦者又以宦寺閹人合五星為斗又以內屏四星為斛皆誤也

又曰凡三垣紫宮在中天市在紫宮之東北太微在紫宮之東南而大角在紫宮之正東故天市在大角左太微在大角右大角一星晉隋志雜之衆星中謂之天王座其說不同司馬遷云大角者天王帝廷其兩旁各有三星鼎足勾之曰攝提攝提者直斗柄所指以建時節故曰攝提格雖於衆星中頗表而出之

亦未為得也故凡曰天王座曰天王帝廷曰直斗柄所指以建時節皆非是

文獻通考卷二百七十八

欽定四庫全書

文獻通考卷二百七十九

鄒陽 馬端臨 貴興 著

象緯考二

二十八宿

東方 蒼龍七宿

宋中興天文志石氏云東宮青帝其精蒼龍為七宿  
其象有角有亢有氐有房有心有尾有箕氐胸房腹

箕所糞也司春司木司東嶽司東方司鱗蟲三百有六十蒼龍為鱗蟲之長

角兩星南北正直著中有平道上天田總是黑星兩相連別有一烏名進賢平道右畔獨淵然最上三星周鼎形角下天門左平星雙雙橫於庫樓上庫樓十星屈曲明樓中柱有十五星三三相著如鼎形其中四星別名衡南門樓外兩星橫

角二星十二度為主造化萬物布君之威信謂之天



闕其間天門也其內天庭也故黃道經其中七曜之  
所行也其明則太平芒動則國不寧日食右角國不  
寧月食左角天下道斷金火犯有戰敵金守之大將  
持政左角為天田為理主刑其南為太陽道五星犯  
之為旱右角為將主兵其北為太陰道五星犯之為  
水蓋天之三門猶房之四表也左右角間二星曰平  
道為天子八達之衢明正則吉動搖則法駕有虞天  
田主天子畿內封疆金守之主兵火守之主旱水守

之主遼平道西一星曰進賢在太微宮東明則賢者在位暗則在野又曰主卿相主逸才周鼎三星在攝提西國之神器也不見或移徙則運祚不寧天門二黑星在平星北角之南主天之門為朝聘待客之所明則四方歸化不見則兵革起邪佞生平星二星在庫樓北平天下之法獄廷尉之象也庫樓十星其六大星為庫南四星為樓在角南一曰天庫兵車之府也旁十五星三三而聚者柱也中央四小星衡也主

陳兵其占曰庫中星不見兵四合無星則下臣謀上  
明而動搖則兵出四方盡不見則國無君庫樓東北  
二星曰陽門主守隘塞也南門二星在庫樓南天之  
外門也主守兵明則遠方入貢暗則夷狄畔客星守  
之主兵至

宋兩朝天文志角二星距南星去極九十七度半  
庫樓二星距西北星去極一百二十三度入軫十五  
度半 南門二星距西星去極一百三十七度入軫

十一度 平道二星距東星去極九十一度入角二  
度 天門二星距西星去極一百四度半入軫十六  
度 平星二星距西星去極一百九度半入軫十六  
度 天田二星距西星去極八十二度半入角二度  
半 周鼎三星距東北星去極六十四度半入角宿  
七度半

亢四星恰似彎弓狀大角一星直上明折威七箇亢下  
橫大角左右攝提星三三相似如鼎形折威下左頓頑

星兩箇斜安黃色精頑西二星號陽門色若頑頑直下  
存

亢四星九度日月之中道主天子內朝天下之禮法  
也又曰總攝天下奏事聽訟理獄錄功者也亦為疏  
廟主疾疫其星明大四海歸王輔臣納忠人無疾疫  
移動多病不見則天下鼎沸而旱澇作矣大角一星  
在攝提間天王坐也又為天子梁棟金守之則兵起  
日食主凶亢南七黑星曰折威主斬殺金火守之夷

狄犯邊將有棄市者攝提六星直斗柄之南主建時  
節伺機祥攝提為盾以夾擁帝坐也主九卿明大三  
公恣橫客星入之聖人受制一曰大臣之象頓頑二  
星在折威東南主考囚察情偽也陽門在庫樓東北  
主邊塞險阻之地客星出陽門夷狄犯邊

宋兩朝天文志亢四星距南第二星去極九十六度  
攝提六星其右距北大星去極六十七度入亢七  
度其左距南星去極七十二度半入亢七度 太陽

門二星距西星去極一百一十三度入角十度 折  
威七星距西第三大星去極一百三度入亢三度  
大角二星去極六十六度入亢二度半 頓頓二星  
距東南星去極一百一十二度半入亢四度

氐四星似斗側量米天乳氐上黑一星世人不識稱無  
名一箇招搖梗河上梗河橫列三星狀帝席三黑河之  
西亢池六星近攝提氐下衆星騎官出騎官之衆二十  
七三三相連十欠一陣車氐下騎官次騎官下三車騎

位天輻兩星在陣傍將軍陣裏振威霜

氐十六度下二尺為五星日月中道為天子之路寢  
明則大臣妃后奉君不失節如不見或移動則臣將  
謀內禍亂生矣日月食主內亂木犯之立妃后火犯  
臣僭上金犯拜將水犯百官憂客星犯婚禮不整彗  
孛犯暴兵起月暈人不安一曰氐為后妃之府休解  
之房前二星適也後二星妾也將有徭役之事氐先  
動星明大則民無勞天乳在氐北主甘露明則潤澤



甘露降招搖一星在梗河北次北斗柄端主胡兵芒  
角變色搖動則兵革大起梗河二星在大角北天子  
以備不虞其色變動有兵喪帝席三星在大角西北  
天子燕樂獻壽之所其星不見大人失位亢池六黑  
星為泛舟楫主迎送移徙則凶騎官二十七星在氐  
南天子騎士之象星衆則安不見兵起車騎三黑星  
在氐西騎官之上都車騎之將也金火犯為災動搖  
車騎行天輻兩黃星在房西主鸞駕客星來守之則

輦轂有憂也騎陣將軍一星在騎官東南主騎將也  
搖動則騎將出

宋兩朝天文志氐四星距西南星去極一百四度半  
亢池六星距北大星去極七十度半入亢三度

天乳一星去極九十二度入氐十四度 招搖一星  
去極五十一度入亢四度半 梗河三星距大星去  
極五十九度入氐二度 騎官二十七星距西北星  
去極一百二十度入氐宿初度 車騎三星距東南

星去極一百四十度入氐二度 帝席三星距東星  
去極六十七度半入氐宿一度半

房四星直下主明堂鍵閉一黃斜向上鈎鈐兩箇近其  
傍罰有三星直鍵上兩咸夾罰似房狀房下一星號為  
日從官兩箇日下出

房六度為明堂天子布政之宮也亦四輔也下第四  
星上將也次次將也次次相也上星上相也南二星  
君位北二星夫人位又為四表中間為天衢之大道

亦謂之天闕黃道之所經也南間曰陽環亦曰陽道  
其南曰太陽北間曰陰間亦曰陰道其北曰太陰七  
曜由乎天衢則天下平和由陽道則主旱喪由陰道  
則主水兵房星亦曰天駟為天馬主車駕南星曰左  
驂次左服次右服次右驂亦曰天廐又主開閉為蓄  
藏之所由也房星明則王者明驂星大則兵起星離  
則人流日月食主昏亂權臣橫彗孛犯之兵起下二  
星為陰五星犯之為水上二星為陽五星犯之為旱

房北二小星曰鈎鈐房之鈐鍵天之管籥主閉藏鍵  
天心也王者孝則鈎鈐明近房天下同心遠則天下  
不和王者絕後房鈎鈐間有星及疎拆則地動河清  
東咸西咸各四星在房星北日月五星之道也為房  
之戶所以防淫泆也明則吉暗則凶日月五星犯守  
之有陰謀火守之兵起罰三星在東咸正西南北而  
列主受金贖罪正而列則法令太平曲而斜行則刑  
罰不中日一星在房中道前太陽之精主明德金火

犯守之有憂從官二星在積卒西北

宋兩朝天文志房四星距南第二星去極一百一十四度半 鍵閉一星去極一百八度入房四度 罰三星距南星去極一百八度入心一度半 東咸四星距西南星去極一百一十一度入心一度 日一星去極一百一十三度入氐十四度半 從官二星距西星去極一百二十二度入氐十四度 西咸四星距西南星去極一百四度半入氐十五度 鈎鈴

二小星去極一百九度半入房二度半

中興天文志甘氏云日一星在房之西氏之東日者陽宗之精也為雞三足為烏二足雞在日中而烏之精為星以司太陽之行度日生於東故於是在焉

心三星中央色最深下有積卒共十二三三相聚心下是

心六度一名大火天王位也中星曰明堂為大辰天子之正位也前星為太子不明則太子不得位後星

為庶子明則庶子繼心上四尺為日月五星之中道  
中心明則化成道昌直則地動移徙不見國亡又曰  
心變黑色大人有憂直則王失勢動則國有憂離則  
民流金火犯血光不止土木犯及日月食不吉月暈  
兵起火來守之國無主客星及孛犯天下兵荒積卒  
十二星在房心西南五營軍士也微而小則吉明大  
搖動兵大起一星亡兵出二星亡兵半出三星亡兵  
出盡他星守之兵大起近臣誅



宋兩朝志心三星距西前星去極一百一十四度半  
積卒十二星距大星去極一百二十六度半入氐  
宿十五度

尾九星如鈎蒼龍尾下頭五點號龜星尾上天江四橫  
是尾東一箇名傳說傳說東畔一魚子龜西一室是神  
宮所以列在后妃中

尾十九度后妃之府後宮之場也北之一丈為天之  
中道上第一星后也次三星夫人次則嬪妾第三星

傍一星名曰神宮解衣之內室尾亦為九子星色欬  
均明大小相承則后妃無妬忌後宮有叙多子孫星  
微細暗后有憂疾疎遠則后失勢動移則君臣不和  
天下亂就聚則大水木犯之及月暈則后妃死火犯  
宮中內亂土犯吉水犯之中有事客星犯大臣誅日  
月食主饑一曰金火守之後宮兵起龜五星在尾南  
漢中主占定吉凶明則君臣和不明則為垂戾亡則  
赤地千里火守之兵起在外守之兵罷天江四星在

尾之北主太陰不欲明明而動水暴出參差則馬貴  
其星不具則津河關道不通熒惑守之有立主客星  
入河津絕傳說一星在尾後河中主後宮女巫祀祀  
神靈祈禱子孕故曰主王后之內祭祀以求子孫詩  
云克禋克祀以弗無子此之象也其星明大王者多  
子孫小而暗後宮少子動搖則後宮不安星搖則天  
子無嗣魚一星在尾後河中主陰事知雲雨之期也  
大明則陰陽和風雨時暗則魚多亡動搖則大水暴

出漢中則大魚多死火守在南則旱在北則水起

宋兩朝天文志尾九星去極一百二十七度半 龜

五星距南第二星去極一百一十四度半入尾宿十

度 魚一星去極一百二十六度入尾宿十五度半

傳說一星去極一百八度半入尾宿十四度

中興天文志石氏云傳說者章祝女巫官一名太祝  
司天王之內祭祀以祈子孫故有太祝以傳說於神  
宮或讀傳為傳遂謂之殷相說自莊周妄言

夾漈鄭氏曰按傳說一星惟主後宮女巫禱祠求子之事謂之傳說者古有傅母有保母傳而說者謂傅母喜之也今之婦人求子皆祀婆神此傳說之義也偶商之傳說與此同音諸子家更不詳審其義則曰傳說騎箕尾而去殊不知箕尾專主後宮之事故有傳說之佐焉

按傳說商之良宰輔也而其星則所主者宮中禱祠以祈子孫其事不類故先儒疑之然諸星中所

謂軒轅社稷造父奚仲王良皆古人之名也蓋在天為星辰在人為聖賢於理有之今疑其不類而改以為傳說則過矣

箕四星形狀如簸箕箕下三星名木杵箕前一黑是糠皮

箕十一度亦謂之天津後宮妃后之位上六尺為天之中道箕一曰天雞主八風凡日月宿在箕東壁翼軫者風起又主口舌主客蠻夷胡貊故蠻夷將動先

表箕焉星大明直則五穀熟君無讒間疎暗則無君  
世亂五穀貴蠻夷不伏内外有差就聚細微天下憂  
動則蠻夷有使來離徙則人流若移入河國災人相  
食月暈金火犯之兵起流星犯大臣叛日宿其野風  
起杵三星在箕南主杵白之用也縱為豐橫為饑移  
徙人失業不見人相食客星入杵白天下有急變糠  
一星在箕口前杵白西北明則為豐暗為饑不見人  
相食

宋兩朝天文志箕四星距西北星去極一百二十一  
度半 杵三星距中心大星去極一百三十八度入  
箕宿三度 糠一星去極一百一十七度入尾宿十  
七度半

北方 元武七宿

宋中興志石氏云北方黑帝其精元武為七宿斗有  
龜蛇蟠結之象牛蛇象女龜象虛危室壁皆龜蛇蟠  
蚪之象司冬司水司北嶽司北方司介蟲三百有六



十王奕曰龜不獨介蟲之長也北冬令其氣蟄藏有  
縮藏之象焉

斗六星其狀似北斗魁上建星三相對天弁建上三三  
九斗下圓安十四星雖然名鼈貫索形天雞建背雙黑  
星天籥柄前八黃精狗國四方雞下生天淵十星鼈東  
邊更有兩狗斗魁前農家丈人狗下眠天淵十黃狗色  
元

斗二十五度天廟也亦曰天機五星貫中日月正道

為丞相太宰之位酌量政事之宜褒進賢良稟授爵祿又主兵南二星魁天梁也中央二星天相也北二星杓天府廷也亦為壽命之期將有天子之事占於南斗星盛明君臣一心天下和平爵祿行芒角動搖天子愁兵起移徙其臣逐日月五星逆入斗天下流蕩孛犯之兵起星小暗則廢宰相及死鼈十四星在南斗南鼈為水蟲歸太陰有星守之白衣會主有水火守之早建六星在斗背亦曰天旗臨於黃道天之

都關也建斗之間七曜之道建為謀事為天鼓為天  
馬南二星天庫也中央二星市也鈇鎖也上二星旗  
跗也建動搖則人勞月暈之蛟龍見牛馬疫月食五  
星犯守大臣相譖臣謀主亦為關梁不通有大水天  
弁九星在建星北入河市官之長也主列肆闌闔若  
市籍之事以知市珍也星明則吉彗星犯守之糴貴  
兵起天雞二星在狗國北主候時也金火守入兵大  
起天籥八星在斗南北杓西主鎖鑰關閉明吉暗凶

狗國四星在建東北主鮮卑烏丸沃沮明則邊寇作  
金火犯守外夷有變太白逆守其國亂客星守犯之  
有大盜其王且來天淵十星在鰲東南一曰天海主  
溉灌火守之大旱水守之大水一曰主海中魚鰲狗  
二黑星在斗魁前主吠守防奸回也不居常處為大  
災農丈人一星在南斗西南老農主稼穡也其占與  
糠略同

宋兩朝志南斗六星距西第三星去極一百一十九

度 鰲十四星距東大星去極一百三十度入斗五  
度 天弁九星距西大星去極九十九度半入斗宿  
初度 建六星距西星去極一百一十三度入斗宿  
四度 天籥八星距西大星去極一百一十四度半  
入尾宿十九度 狗二星距東大星去極一百一十  
八度入斗宿十二度 天淵十星距中北星去極一  
百二十九度入斗宿十七度 天雞二星距西星去  
極一百一十度入斗宿十六度半 狗國四星距西

北星去極一百二十度入斗宿十八度 農丈人一  
星去極一百二十四度半入箕宿六度半

牛六星近在河岬頭頭上雖然有兩角腹下從來欠一  
脚牛下九黑是天田田下三三九坎連牛上直建三河  
鼓鼓上三星號織女左旗右旗各九星河鼓兩畔左邊  
明更有四黃名天桴河鼓直下如連珠羅堰三烏牛東  
居漸臺四星似口形輦道東足連五丁輦道漸臺在何  
許欲得見時近織女

牛七度天之闕梁日月五星之中道主犧牲其北二  
星一曰即路二曰聚火又曰上一星主道路次二星  
主闕梁次三星主南越甘氏曰上二星主道路次二  
星主闕梁次二星主南夷中一星主牛移動則牛多  
殃明大則王道昌其星曲則糴貴又曰星明大則闕  
梁通牛貴怒則馬貴不明失常穀不登細則牛賤中  
星移上下牛多死小星亡則牛多疫月暈損犢金火  
犯之兵災水土犯之吉天田九星牽牛南太微東主

天子畿內之田其占與角之天田同九坎九黑星在天田東主溝渠所以導達泉源流瀉盈溢明盛則有災夷狄侵邊不明則吉河鼓三星在牽牛北天鼓也主軍鼓及鈇鉞一曰三武主天子三將軍中央大星為大將軍左星為左將軍右星為右將軍左星南星也所以備關梁設險阻而拒難也明大光潤將軍吉動搖差度亂兵起直則將有功曲則將失律右旗左旗各九星在河鼓左右皆天之旗鼓也旗星明潤將



軍吉動搖兵起怒則馬貴旗端四星南北列曰天桴  
鼓桴也星不明漏刻失時動搖軍鼓用桴鼓相直亦  
然織女三星在河北天紀東端天女也主果蓏絲綿  
寶玉也王者至孝神祇咸喜則織女星俱明天下和  
平大星怒角布帛貴又曰三星俱明女功善暗而微  
天下女功廢不見兵起東足四星曰漸臺臨水之臺  
也主漏刻律呂之事西足五星曰輦道天子嬉遊之  
道金火守之御路兵起羅堰三星在牽牛東主堤塘

壅蓄水潦灌溉田苗大而明大水泛濫

宋兩朝天文志牛六星距中央大星去極一百八度半  
天田九星距西北星去極一百一十六度半入  
斗宿二十二度 九坎九星距大星去極一百四十  
一度半入斗宿二十五度 左旗九星距西第四大  
星去極七十三度半入斗宿二十四度 天桴四星  
距大星去極九十四度入斗宿二十四度半 羅堰  
三星距北星去極一百九度入牛宿四度 漸臺四

星距東南星去極五十八度入斗宿十度 輦道五  
星距西北星去極四十七度半入斗宿十一度半  
織女三星距大星去極五十二度半入斗宿五度  
夾潒鄭氏曰按張衡云牽女織女七月七日相見  
者即此也爾雅云河鼓謂之牽牛又歌曰東飛百  
勞西飛燕黃姑織女時相見黃姑即河鼓也音訛  
耳

容齋洪氏隨筆曰宋蒼梧王當七夕夜令楊玉夫

伺織女渡河曰見當報我不見當殺汝錢希白洞微志載蘓德哥為徐肇祀其先人曰當夜半可已蓋候鬼宿渡河之後翟公巽作祭儀十卷云或祭於昏或祭於旦皆非是當以鬼宿渡河為候而鬼宿渡河常在中夜必使人仰占以候之葉少蘊云公巽博學多聞援證皆有据不肯碌碌同衆所見必過人予按天下經星終古不動鬼宿隨天西行春昏見於南夏晨見於東秋夜半見於東冬昏見於

東安有所謂渡河及常在中夜之理織女昏晨與  
鬼宿正相反其理則同蒼梧王荒悖小兒不足笑  
錢翟葉三公皆名儒碩學亦不深考如此杜詩云  
牛女漫愁思秋期猶渡河牛女年年渡何曾風浪  
生梁劉孝儀詩云欲待黃昏至含嬌淺渡河唐人  
七夕詩皆有此說此自是牽俗遣詞之過故杜老  
又有詩云牽牛出河西織女處其東萬古永相望  
七夕誰見同神光竟難候此事終朦朧蓋自洞曉

其實非他人比也

女四星如箕主嫁娶十二諸國在下陳先從越國向東  
論東西兩周次二秦雍州南下雙鴈門代國向西一晉  
伸韓魏各一皆北輪楚之一國魏西屯楚城南畔獨燕  
軍燕西一郡是齊隣齊北兩邑平原君欲知鄭在越下  
存十六黃星細區分五箇離珠女上星敗瓜珠上瓠瓜  
生兩箇各五瓠瓜明天津九箇彈弓形兩星入牛河中  
橫四箇奚仲天津上七箇仲側扶筐星

女十一度下九尺為日月中道天之少府也謂之須  
女者須賤妾之稱婦職之卑者也主婦女之位其星  
如婦功之式主布帛裁製嫁娶星明天下豐女功昌  
小暗則國藏虛移動則婦女受殃產死者多后妃廢  
日月食國憂木犯立后火犯女喪金犯災土孛犯損  
蠶月暈婦人災又曰水守之萬物不成火守之布帛  
貴人多死土守之有女喪金守之兵起十二國有十  
六星齊一星在九坎之東齊北二星曰趙趙北一星

曰鄭鄭北一星曰越越東二星曰周周東南北列二  
星曰秦秦南二星曰代代西一星曰晉晉北一星曰  
韓韓北一星曰魏魏西一星曰楚楚南一星曰燕其  
星有變各以其國離珠五星在須女北須女之藏府  
也為女子之星非其故後宮亂客星犯之後宮凶瓠  
瓜五星在離珠北主陰謀主後宮主果食明則歲熟  
微則后失勢瓜果不登客星守之魚鹽貴旁五星曰  
敗瓜主種與瓠瓜略同天津九星在虛危北橫漢中



津梁所度明而動則兵起如流沙死人如亂麻參差不齊馬貴一星不脩關梁不通三星不備覆陷天下星亡水災河溢水賊稱王奚仲四星在天津北古車正也金火守之兵車必起扶筐七黑星主蠶事見吉不見凶

宋兩朝天文志女四星距西南星去極一百四度半十二諸侯十六星其趙距西星去極一百二十三度入牛宿四度離珠五星距東北大星去極九十

五度入牛宿六度半 敗瓜五星距南星去極八十  
二度半入牛宿六度 瓠瓜五星距西星去極七十  
九度入牛宿七度 天津九星距西消星去極四十  
七度半入斗宿二十三度 奚仲四星距西北星去  
極三十八度入牛宿十八度

宋中興天文志石氏云女一名婺女左傳昭公十年  
有星出於婺女杜預注婺女為既嫁之女織女為處  
女也

夾漈鄭氏曰謹按天之所覆者廣而華夏所占者  
牛女下十二國耳牛女在東南故釋氏謂華夏為  
南瞻部州其二十八宿所管者多十二國之分野  
隨其隸耳

按鄭氏因牛女間有十二國星而以為華夏所占  
者只牛女二宿且引釋氏南瞻部州說以為證然  
以十二次言之牛女雖屬揚州而華夏之地所謂  
十二國者則不特揚州而已又揚州雖可言東南

而牛女在天則北方宿也與南贍部州之說異矣  
且北斗七星其次舍自張而至於角星書以為一  
主秦二主楚三主梁四主吳五主趙六主燕七主  
齊五車五星其次舍在畢星書以為西北一星主  
秦東北一星主趙燕東南一星主魯衛中央一星  
主楚西南一星主魏然則北斗五車所主者亦此  
十二國而此二星初未嘗屬乎牛女也謂牛女專  
主華夏可乎

虛上下各一如連珠命祿危非虛上呈虛危之下哭泣  
星哭泣雙雙下壘城天壘圓團十三星敗白四星城下  
橫白西三箇離瑜明

虛九度少強冢宰之官也主邑居廟堂祭祀之事又  
主風雲死喪哭泣日月食兵起流星犯賊亂宗廟五  
搖則有死喪哭泣日月食兵起流星犯賊亂宗廟五  
星犯有災虛北二星曰司命主舉過行罰滅不祥又  
北二星曰司祿主爵祿增年延德故在六宗之祀司

危二星在司祿之北主驕佚司非二星在危之北主  
愆過凡此四司皆黑星明大為災居常則平虛南二  
星曰哭主號哭也哭東二星曰泣主死明則國多哭  
泣金火守之亦然泣南十三星曰天壘城如貫索形  
主北夷丁零匈奴敗白四星在虛危南知凶災他星  
守之饑兵起秦代東三星南北列曰離瑜離圭衣也  
瑜玉飾皆婦人之服星也微則後宮儉約明大則婦  
人奢

宋兩朝天文志虛二星距南星去極一百度半 司

命二星距西星去極九十二度入虛宿三度 司祿

二星距西星去極九十度入虛宿四度 司危二星

距西星去極八十五度半入女宿八度 司非二星

距西星去極七十九度半入女宿九度半 哭二星

距西星去極一百一十七度半入女宿九度 泣二

星距南星去極一百四度半入危宿三度 天壘城

十三星距西星去極一百二十六度入女宿十一度

敗臼四星距北星去極一百三十九度半入虛宿  
八度 離瑜三星距西星去極一百二十八度入女  
宿九度

危三星不直舊先知危上五黑髡人星人下三四杵臼  
形人上七烏髡車府府上天鈎九黃晶鈎上五鵝字造  
父危下四星髡墳墓墓下四星斜虛梁十箇天錢梁下  
黃墓傍兩星能蓋屋身著黑衣危下宿

危十六度主天府天庫架屋甘氏云為天市廟堂下



九尺為天之中道主祭屋受藏風雨墓墳祠祀如動  
則天下大動土功張衡云虛危等為死喪哭泣之事  
亦為邑居廟堂祠祀之事冢宰之官勤則死喪哭泣  
火守則天子將兵金守則饑饉兵起虛危動則有土  
功火守則兵起水守則下謀上一云危動則不明土  
功兵革起月暈日月五星犯即有災車府東南五黑  
星曰人星有如人象主靜衆庶柔遠能邇一曰卧星  
主防淫不見則人有詐行詔書明則人安暗凶内杵

三星在人星傍主軍糧正直下白吉不相當糧絕不  
直民饑內白四星在人星東南主春白覆則大饑仰  
則大豐隋志云客星入杵曰兵起天下聚米天津東  
南七星曰車府東近河邊抵司非主官車之府金火  
守之兵車大動天鉤九星如鉤狀在造父西河中主  
乘輦服飾法式直則地將動明則服飾正也傳舍南  
河中五星曰造父御官也一曰司馬或曰伯樂星亡  
馬大貴明則吉墳墓四星在危下如墓形主喪葬之

事明則多死亡虛梁四星在蓋屋南主園陵寢廟非人所處故曰虛梁金火守入犯兵災大起天錢十星在北落西北主錢帛所聚占明則府藏盈不爾虛耗金火守之兵盜起蓋屋二星在危南主天子所居室亦為宮室之官金守之國兵起彗星尤甚也

宋兩朝天文志危三星距南星去極九十六度人五星距西南星去極七十度入虛宿六度半杵三星距南星去極六十一度半入危宿三度白四星

距西南星去極六十九度半入危宿三度半 車府

七星距西第一星去極五十六度半入虛宿四度半

造父五星距北星去極三十八度入危宿十一度

墳墓四星距中星去極九十六度入危宿五度半

虛梁四星距東西去極一百度半入危宿八度

天錢十星距東北星去極一百一十八度入危宿三

度 蓋屋二星距西星去極九十七度入虛宿九度

室兩星上有離宮出遼室三雙有六星下頭六箇雷電

形壘壁陣次十二星十二兩頭大似并陣下分布羽林  
軍四十五卒三為羣軍西四星多難論子細歷歷看區  
分三粒黃金名鈇鉞一顆真珠北落門門東八魁九箇  
子門西一宿天綱是電傍兩黑土公吏騰蛇室上二十  
二

室十七度亦謂之營室甘氏為太廟天子之宮也石  
氏謂之元宮一曰清廟又謂軍糧之府及土功事星  
明國昌小不明祠祀鬼神不享國多疾疫動則有土

功兵出野離宮六星兩兩居之分布室壁之間天子  
之別宮也主隱藏休息之所金火守入則兵起室南  
六星曰雷電主興雷動蟄明或動則震雷作壁陣十  
二星在羽林北橫列營室之南羽林之垣壘也星衆  
而明則安寧希而動則兵革起不見天下亂五星入  
天軍皆為兵起金火水尤甚羽林四十五星三三而  
聚散在營室之南天軍也主軍騎又主翼王也星衆  
而明則安寧希而動則兵革起不見天下亂金火水

守入兵起斧鉞三星亦曰斧鉞在八魁西北主誅夷  
不明則斧鉞不用移動則兵起有星入之皆為大臣  
誅北落師門一星在羽林西南天之蕃落也亦曰天  
軍蕃之候門長安北門曰北落門以象此也主非常  
以候兵明大則軍安微弱則兵起金火守之有兵災  
一曰有星守之虜入塞北落東南九黑星曰八魁主  
張禽獸之官也客星入之多盜賊兵起金火入亦然  
北落西南一星曰天綱主武帳天子游獵之所會金

火守兵起室西南二星曰土功吏主土功之官也動  
搖則有修築之事隋志土功吏主司過度騰蛇二十  
二星在營室北若盤蛇之狀居於河濱謂之天蛇星  
主水蟲微則國安明則不寧移南大旱移北大水客  
星守之水雨為災水物不收

宋兩朝天文志室二星距南星去極八十度半 雷  
電六星距西南星去極八十七度入危宿十二度  
壁陣壘十二星距西第一星去極一百十五度入女



宿十一度 羽林四十五星距大星去極一百一十七度入危宿十五度半 斧鉞三星距北星去極一百三十度入室宿二度 北落師門一星去極一百二十六度入危宿十一度半 八魁九星距南星去極一百三十九度入壁宿四度半 天綱一星去極一百二十九度入危宿五度 土公二星距西星去極八十五度入壁宿初度 騰蛇二十二星距中大星去極四十四度入危宿九度半

宋中興天文志曰甘氏云雷電在室南霹靂在雷電  
南雲雨在霹靂南土工吏在壁西南蓋雷公電姥雲  
將雨師與夫霹靂斧吏皆北方水府之精而歟訾為  
天門故其神棲焉室不得司之也

壁兩星下頭是霹靂霹靂五星橫著行雲雨次之曰四  
方壁上天廐十圓黃鉞鎖五星羽林傍

壁九度下九尺為天之中道主文章天下圖書之祕  
府也亦主土功明則圖書集道術行小人退君子進

星失色大小不同天子重武臣賤文士圖書隱親黨  
回邪用星動則有土功離徙就聚為田宅事日月食  
損賢臣五星孛犯兵起土功西南五星曰霹靂主興  
雷奮擊明而動用事不明凶霹靂南四星曰雲雨明  
則多雨水火守之大旱天廐十星在東壁北蓋天馬  
之廐今之驛亭也不見則天下道斷鉄鎖五星在天  
倉西門刈具也主斬芻飼牛馬明則牛馬肥微暗則  
牛馬饑餓并死喪也

宋兩朝天文志壁二星距南星去極八十度半 霹  
靂五星距西星去極九十三度入危宿十五度 雲  
雨四星距西北星去極九十五度入室宿五度 天  
廐十星距西星去極四十九度半入壁宿初度

西方 白虎七宿

宋中興天文志石氏云西宮白帝其精白虎為七宿  
奎象白虎婁胃昂虎三子也畢象虎觜參象麒麟首  
參身也司秋司金司西嶽司西海司西方司毛蟲三

百有六十王奕曰蒼龍朱雀靈龜不獨蟲之長也實  
為王者嘉瑞故列宿象焉白虎奚預也曰白虎亦瑞  
獸也爾雅謂之魼胡甘反蓋騶虞之異名也不食生  
物食自死肉其性至仁五靈之一也以五行媲之蒼  
龍木也木得其性則蒼龍見朱鳥火也火得其性則  
朱鳥見靈龜水也水得其性則靈龜見白虎金也金  
得其性則白虎見與麟鳳龜俱為王者之瑞故西方  
七宿配焉漢宣帝時南郡獲白虎宋元嘉中琅瑯有

白虎史臣俱以為瑞而特書之也

奎腰細頭尖似破鞋一十六星遶鞋生外屏七烏奎下  
橫屏下七星天濶明司空左畔土之精奎上一宿軍南  
門河中六箇閣道形附路一星道傍明五箇吐花王良  
星良星近上一策名

奎十六度天之武庫也石氏謂之天豕亦曰封豕主  
兵九尺下為天之中道又主溝瀆西南大星所謂天  
豕目亦曰大將明則天下安動則兵亂客星守入兵

起金火守有水災隋志云若帝淫佚政不平則奎有  
角角動則有兵不出年中或有溝瀆之事又曰奎中  
星明水大出日月食五星犯皆有凶奎南七星曰外  
屏以蔽天溷也占與天囷同天溷七星在外屏南天  
之廁也不見則人不安移徙亦然天溷南一星曰土  
司空主水土之事大而黃明天下安若客星入之多  
土功天下大疫軍南門一星在將軍西南主誰何出  
入動搖則軍行不見則兵亂閣道六星在王良前飛

道也從紫宮至河神所乘也一曰主道里張衡云天  
子游別宮之道一曰王良旗一曰紫宮旗亦所以為  
旌表而不欲其搖動一星不具則輦道不通動搖則  
宮掖之內兵起附路一星在閣道南傍別道也脩閣  
道之敗復而乘之也一曰太僕主禦風雨亦游從之  
義也一曰占輿閣道同王良五星在奎北居河中天  
子奉車御官也其四星曰天駟旁一星曰王良亦曰  
天馬其星動為策馬故曰王良策馬車騎滿野亦曰



王梁梁為天橋主禦風雨水道故或占津梁其星移  
主有兵亦曰馬病客星守之橋不通金火守之皆為  
兵憂前一星曰策王良之御策也主天子僕御在王  
良旁若移在馬後是謂車騎滿野

宋兩朝天文志奎十六星距西南大星去極七十二  
度 外屏距西星去極八十九度入壁宿八度半  
天濶七星距西南星去極九十七度入奎宿三度  
土司空一星去極一百一十五度少入壁宿九度

軍南門一星去極六十六度入奎宿十五度 附路  
一星去極三十五度半入奎宿五度 王良五星距  
西星去極三十七度入壁宿初度

婁三星不勻近一頭左更右更烏夾婁天倉六箇婁下  
頭天庾三星倉東脚婁上十二將軍侯

婁十二度下九尺為日月中道亦為天獄主苑牧犧  
牲供給郊祀亦為興兵聚衆動搖則聚衆星直則有  
執主之命者就聚國不安金火守之則宮苑之內兵

起日月食宮內亂金木火土犯凶水犯吉亭起兵月  
暈兩軍各退左更五星在婁東山虞也主知山澤林  
藪之事亦主仁智右更五星在婁西牧師也主官養  
牧牛馬亦主禮義金火守之山澤有兵其占兩更同  
兩更者秦爵名天倉六星在婁南倉穀所藏也星黃  
而大歲熟西南四星曰天庾積廚粟之所也天將軍  
十二星在婁北主武兵中央大星天之大將也外小  
星吏士也大將星搖兵起大將出小星不具兵起

宋兩朝天文志婁三星距中星去極七十五度半

左更五星距西南星去極七十六度半入婁宿四度  
半 右更五星距東北星去極七十五度入奎宿十  
四度 天倉六星距西北星去極一百四度半入奎  
宿十一度 天庾三星距中大星去極一百二十五  
度半入婁宿五度 天大將軍十二星距大星去極  
六十度半入婁宿四度

胃三星鼎足河之次天廩胃下斜四星天囷十三如乙

形河中八星名大陵陵北九箇天船名陵中積尸一箇  
星積水船中一黑星

胃十五度天之厨藏五穀之倉也又名大梁明則四  
時和平天下晏然倉廩實不明則上下失位星少則  
少穀輸運又云動則有輸運事就聚則穀貴人流暗  
則凶荒五星犯日月食孛侵並有災天廩四星在昴  
南一曰天廡張衡云主積蓄黍稷以供享祀春秋所  
謂御廩也天囷十三星在胃南倉廩之屬主給御糧

也明而黃則歲豐微變常色則不吉金火守之即災起大陵八星在胃北主陵墓明而大或中星多則天下多死喪或兵起天船九星在大陵之北居河中一曰舟星主渡亦主水旱不在河中津河不通水泛溢中四星歆其均明即天下安不則兵若喪移徙亦然客彗出入為大水有兵大陵中一星曰積尸明則死人如山張衡云一名積廩積尸明而大或有傍星多則天下足死喪或兵起若不見而暗皆吉火守則天

下大哭泣天船中一星曰積水主候水災

宋兩朝天文志胃三星距西南星去極六十七度半  
天廩四星距南星去極八十五度半入胃宿十二  
度 天囷十三星距大星去極九十一度半入胃宿  
六度半 大陵八星距大星去極五十四度入胃宿  
七度 天船九星距大星去極五十四度半入胃宿  
十度 積尸一星去極五十五度入胃宿四度 積  
水一星去極五十三度入昴宿初度

昴七星一聚實不少河西月東各一星月下五黃天陰  
名陰下六鳥芻藁營營南十六天苑形河裏六星名卷  
舌舌中黑點天讒星礪石舌傍斜四丁

昴十一度下為日月中道天之耳目也主西方主獄  
事又為旄頭胡星也又主喪甘氏云主口舌奏對若  
明大則君無佞臣天下安和暗小則佞者被誅搖動  
則信讒殺忠良張衡云昴明則獄訟平暗則刑罰濫  
六星與大星等大星有白衣會七星黃兵大起動搖



有大臣下獄大而盡動若跳躍者胡兵大起一星不見皆憂兵之象也天河一星在胃東月一星在昴東皆黑星並主女人災福又曰天河主察山林妖變天陰五星在畢柄西主從天子弋獵之臣預陰謀也不明則禁言漏洩天苑十六星在昴畢南如環狀天子之苑囿養禽獸之所也主馬牛羊明則馬牛羊盈希則死芻藁六星在苑西以供牛馬之食也一曰天積天子之藏府也星盛則歲豐穰希則貨財散張衡云

不見則牛暴死火守之則火災起卷舌六星在昴北  
天讒之外主口語以知讒佞張衡云主樞機曲而靜  
則賢人用直而動則讒人得志卷舌移出漢則天下  
多妄言旁星繁則死人如邱山天讒一星在卷舌中  
主醫巫占與從官同礪石四星在五車北主磨礪鋒  
刃明則兵起如常則吉金火及客星守之兵動

宋兩朝天文志昴七星距西南星去極七十度 天  
河一星去極六十六度入胃宿十度 月一星去極

七十一度半入昴宿五度 天陰五星距西星去極  
七十五度半入胃宿七度 天苑十六星距東北星  
去極一百七度半入昴宿七度半 芻藁六星距西  
行中星去極一百八度入婁宿十一度 卷舌六星  
去極五十三度入昴宿初度 天諛一星去極六十  
一度半入昴宿半度 礪石四星距南第二星去極  
六十五度入昴宿六度

宋中興天文志月與天街皆在昴畢間故昴畢之間

為天街黃道之所經也月者陰宗之精也為兔四足  
為蟾蜍三足兔在月中而蟾蜍之精為星以司太陰  
之行度月生於西故於是在焉日精在氐房月精在  
昴畢自司其行度而氐房昴畢乃黃道之所經不得  
而司之

畢恰似瓜叉八星出附耳畢股一星光天街兩星畢背  
傍天節耳下八烏幢畢上橫列六諸王王下四皂天高  
星節下團圓九州城畢口斜對五車口車有三柱任縱

橫車中五箇天潢精潢畔咸池三黑星天關一星車脚  
邊參旗九箇參車間旗下直建九旂連旂下十三烏天  
園九旂天園參脚邊

畢十七度主邊兵主弋獵其大星曰天高一曰邊將  
主四夷之尉也星明大則遠夷來貢天下安失色則  
邊兵亂一星亡為兵喪動搖邊城兵起有讒臣離徙  
天下獄亂就聚法令酷甘氏云畢主街巷陰雨天之  
雨師也故明而移動則霖潦及街壅塞明而定則天

下安張衡云畢為天馬一曰日月食邊兵凶將衰木  
犯有軍功昂畢間二星曰天街三光之道也主伺候  
闕梁張衡云主國界也街南為華夏街北為夷狄金  
火守之胡夷兵起明王道正暗兵起附耳一星在畢  
下天高東南隅主聽得失伺愆邪察不祥星盛則中  
國微有盜賊邊候警外國反鬪兵連年合移動則佞  
讒行兵大起邊尤甚入畢兵起天節八星在畢南主  
使臣之所持也宣威德於四方明吉暗凶諸王六星

在五車南天漢之中主宗社蕃屏王室也明則諸侯  
奉上天下安不見宗社傾危四方兵起天高四星在  
參旗西北近畢此臺榭之高主遠望氣象不見則官  
失其守陰陽不和五車五星三柱九星共十四星在  
畢東北五車主天子五兵張衡云天子兵車舍也西  
北曰天庫主太白秦也次東北星曰天獄主辰星燕  
趙也次東南星曰天倉主歲星衛魯也中央星曰司  
空主鎮星楚也次西南星曰御星主熒惑魏也五星

有變各以其所主而占之三柱一曰三泉一曰休一  
曰旗五星均明柱皆具即人倉廩實不具其國絕食  
兵且起五車三柱有變各以其國占之三柱出外兵  
出柱入兵入柱出一月米貴三倍期一年出兩月米  
貴六倍期二年出三月米貴十倍期三年柱出不與  
天倉相近米穀運出千里柱倒立尤甚火入守天下  
旱金入守兵起水入月暈不爾則有赦天潢五星在  
五車中主河梁濟渡之處也不見則河梁不通咸池



三星在五車中天潢南魚圓也金火犯之則有大災  
隋志云月五星入天潢兵起道不通天下亂易政咸  
池明有龍墜死虎狼害人兵起天闕一星在五車南  
畢西北亦曰天門日月五星所行之道也主邊塞事  
主關閉芒角有兵五星守之貴人多死移徙若與五  
車合大將軍披甲參旗九星在參西五車之間天旗  
也明而希則邊寇不動不然反是隋志參旗一曰天  
旗一曰天弓主司弓弩之張候變禦難玉井西南九

星曰九斿天子之旗也主邊軍進退金火守之兵亂起天苑之南十三星曰天園植果菜之所也曲而鉤則果菜熟不然則否

宋兩朝天文志畢八星距右股第一星去極七十五度 天街二星距南星去極七十一度入昴宿十度 附耳一星去極七十七度畢宿三度 天節八星距北星去極八十度半入畢宿三度 諸王六星距西星去極七十度入畢宿三度 天高四星距東星

去極七十四度半入畢宿六度 五車五星三柱九  
星距大星去極四十七度半入畢宿八度半 天潢  
三星距西北星去極五十八度入畢宿十一度 咸  
池三星距南星去極五十一度入畢宿十一度半  
天闕一星去極七十一度半入觜宿初度 參旗九  
星距南第一大星去極八十七度入畢宿六度 九  
斿九星距南星去極一百一十三度入畢宿十二度  
天園十三星距東北星去極一百二十四度入畢

宿五度

觜三星相近作參樂觜上坐旗直指天尊卑之位九相連司怪曲立坐旗邊四鵠大近井鉞前

觜一度在參之右角如鼎足形主天之闡明大則天下安五穀熟移動則君臣失位天下旱隋志云觜觿為三軍之候行軍之藏府主葆旅收斂萬物明則軍儲盈將得勢動而明盜賊羣行葆旅起動移將有逐者張衡云葆旅野生之可食者金火來守國易政兵

起災生日食臣不忠月食君害臣五星犯災生李客  
星犯兵起坐旗九星在司怪西北主別君臣尊卑之  
位明則國有禮暗則反是司怪四星在井鉞前候天  
地日月星辰禽獸蟲蛇草木之變與天高占同

宋兩朝天文志觜三星距西南星去極八十二度半  
坐旗九星距南星去極六十一度半入參宿八度  
司怪四星距西星去極七十一度入參宿六度半  
參總有七星觜相侵兩肩雙足三為心伐有三星足裏

深玉井四星右足陰屏星兩扇井南襟軍井四星屏上  
吟左足下四天廁臨廁下一物天屎沉

參十度上為五星日月中道甘氏曰參為忠良孝謹  
之子明大則臣忠子孝安吉移動殺忠臣一曰參伐  
一曰大辰一曰天市一曰鈇鉞主斬刈又為天獄主  
殺伐又主權衡所以平理也又主邊城為九譯故不  
欲其動也參白獸之體其中三星橫列三將也東北  
曰左肩主左將西北曰右肩主右將東南曰左足主

後將軍西南曰右足主偏將軍故黃帝占參應七將  
中央三小星曰伐天之都尉也主胡鮮卑戎狄之國  
故不欲明又曰七將皆明天下兵精也王道缺則芒  
角張伐星明與參等大臣謀亂兵起參星失色軍散  
敗芒角動搖邊候有急天下兵起又曰有斬伐之事  
參左足入玉井中兵大起秦地大水若有喪山石為  
怪參足若突出玉井則虎狼暴害星差戾王臣貳金  
火來守則國易政兵起災生日月食則田荒米貴五

星犯災甚玉井四星在參西右下水象也屏二星在  
玉井南屏為屏風客星入之四足蟲大疾人亦多死  
不見則國內寢疾玉井東西四星曰軍井行軍之井  
也軍井未達將不言渴名取此也又曰主軍營之事  
天廁四星在屏東濶也主天下疾病黃吉青赤白皆  
凶不見與屏同天屎一星在廁南色黃則吉他色皆  
凶

兩朝天文志參十星距中星西第一星去極九十二



度半 玉井四星距西北星去極九十八度少入畢  
宿十一度半 天屏二星距南星去極一百一十五  
度入畢宿十三度半 軍井四星距西南星去極一  
百五度半入畢宿十四度 天廁四星距西北星去  
極一百一十度半入參宿二度 屎一星去極一百  
一十五度入參宿三度半

南方 朱鳥七宿

中興天文志石氏云南宮赤帝其精朱鳥為七宿井

首鬼目柳喙星頸張喙翼翩軫尾司夏司火司南嶽  
司南海司南方司羽蟲三百有六十王奕曰朱鳥其  
以羽蟲之長稱歟而曰鶉首鶉火鶉尾何也師曠禽  
經鶉鳳也青鳳謂之鶉赤鳳謂之鶉白鳳謂之鶉紫  
鳳謂之鶉蓋鳳生於丹穴鶉又鳳之赤者故南方七  
宿取象焉考之月令春其蟲鱗龍鱗之長故東方之  
宿為蒼龍秋其蟲毛虎毛蟲之長故西方之宿為白  
虎冬其蟲介龜介蟲之長故北方之宿為元武夏其

蟲羽鳳羽蟲之長故南方之宿為朱鳥吳興沈氏以  
朱鳥為丹鷄豈知四獸皆蟲之長也鷄之微何預

井八星行列河中淨一星名鉞井邊安兩河各三南北  
正天樽三星井上頭樽上橫列五諸侯侯上北河西積  
水欲覓積薪東畔是鉞下四星名水府水位東邊四星  
序四瀆橫列南河裏南河下頭是軍市軍市團圓十三  
星中有一箇野雞精孫子丈人市下列各立兩星從東  
說關丘三箇南河東立下一狼光蓬茸左畔九箇彎弧

弓一矢擬射頑狼胃有箇老人南極中春秋出來壽無窮

井三十四度甘氏云井八星在河中主泉水日月五星貫之為中道石氏謂之東井亦曰天井主諸侯帝戚三公之位故明大則封侯建國搖動失色則誅侯戚廢戮三公帝師受殃矣張衡云天之南門也黃道所經為天子之亭候主水衡事法令所取平也王者用法平則井明而端列鉞一星附井之前主伺奢淫

而斬之故不欲其明大與井齊或搖動則天子用鉞  
於大臣月宿井有風雨之應又曰井為天子府暗芒  
并日月食五星逆犯大臣謀亂兵起中有六星不欲  
大明明即水災南北兩河各三星分夾東井一曰天  
高天之闕門主關梁河南曰南戍一曰南宮一曰陽  
門一曰越門一曰權星主火北河曰北戍一曰北宮  
一曰陰門一曰胡門一曰衡星主水兩戍之間三光  
之常道也河戍動搖中國兵起天樽三星在五諸侯

南主盛饘粥以給酒食之正也張衡云以給貧餒明則豐暗則荒或言暗吉五諸侯五星在東井東北近北河主刺舉戒不虞又曰治陰陽察得失亦曰主帝心一曰帝師二曰帝友三曰三公四曰博士五曰太史又曰五曰大夫此五者常為帝定疑議星明大潤澤則天下大治芒角則禍在中張衡又曰五諸侯治陰陽察得失明而潤大小齊等則國之福又曰赤則豐暗則荒積水一星在河北所以供酒用也不見為

災又曰主候水災積薪一星在積水東以脩庖厨之用明則人主康火守之大旱水府四星在東井西南水官也占與水位同水位四星在東井主水衡又主瀉溢流也故巫咸氏贊曰水位四星瀉溢流移動近北河則國沒為江河若水火及客星守犯之百川盈溢四瀆四星在井南軒轅東是江河淮濟之積精也明大則水泛溢軍市十三星如錢狀在參東南天軍貨易之市客星及金火守之軍大饑野雞一星在軍

市中主變怪也以芒角動搖為兵災移出則諸侯兵起軍市西南二星曰丈人丈人東二星曰子子東二星曰孫丈人主壽考之臣不見人臣不得通子與孫皆侍丈人之側相扶而居不見為災守常無咎闕邱三星在南河東主象魏天子之雙闕諸侯之兩觀也金火守之兵戰闕下狼一星在井東南為野將主殺掠色有常不歆變動角而變色動搖盜賊作胡兵起人相食蹠則人主不靜不居其宮馳騁天下張衡云



居非其處則人相食色黃白而明吉黑凶赤芒角兵  
起金火守之亦然弧矢九星在狼東南天弓也以備  
盜賊嘗向狼弧矢動搖不如常者多盜賊明則兵大  
起狼弧張害及胡天下乖亂又曰天弓張天下盡兵  
主與臣相謀張衡云滿則天下兵起老人一星在弧  
南一曰南極常以秋分之旦見於丙春分之夕沒於  
丁常以秋分候之南郊明大則人主有壽天下安寧  
不見則人主憂

兩朝天文志井八星距西扇北第一星去極六十九度 鉞一星去極六十九度少入參宿八度半 北

河三星距東大星去極六十一度半入井宿二十度

南河三星距東大星去極八十三度半入井宿二

十一度 天樽三星距西星去極六十八度入井宿

十六度 五諸侯五星距西星去極五十六度半入

井宿六度半 積水一星去極五十四度半入井宿

十八度 積薪一星去極六十五度半入井宿二十

七度 水府四星距西星去極七十六度半入參宿  
七度半 水位四星距西星去極七十三度半入井  
宿十八度 四瀆四星距西南星去極八十六度入  
井宿二度 軍市十三星距西北星去極一百七度  
半入井宿初度 野雞一星去極一百九度半入井  
宿四度半 大人二星距西星去極一百二十八度  
入參宿四度 子二星距西星去極一百二十八度  
入參宿九度 孫二星距西星去極一百二十五度

入井宿六度 闕邱二星距大星去極九十一度少  
入井宿十五度 狼一星去極一百七度半入井宿  
十度 弧矢九星去極一百一十四度入井宿十五  
度 老人一星去極一百四十三度入井宿三度

宋中興天文志南極老人在弧矢南司天下人民壽  
算蓋北極在丑艮故南極在未坤南極入地三十六  
度不可得而見也故其精神出地以見乎南謂之南  
極老人然其出地亦不甚遠故隱見不常見則為祥

其勢位等威蓋與中斗相埒以輔上帝故雖在井分井不得而司之也

鬼四星冊方似木櫃中央白者積尸氣鬼上四星是耀位天狗七星鬼下是外厨六間柳星次天社六箇弧東倚社東一星是天紀

輿鬼二度為日月五星之中道主死亡疾病張衡云主祠事天日也又主視明察奸謀東北星主積馬東南星主積兵西南星主積布帛西北星主積金玉隨

其變占之中央一星名積尸亦曰積尸氣者但見氣而已主死喪祠祀一曰鈇質主誅斬鬼星明六穀成不明人散動而光上賦斂重徭役多星徙人愁政令急鬼質歆其忽忽不明則安明則兵起大臣謀主下流亡甘氏云積尸搖動失色則疾病鬼哭人荒軒轅西四星曰燿亦曰烽燿主烽火脩警急占以不明安靜明大甚則邊亭警急搖動芒角亦然又曰明吉暗凶天狗七星在鬼西南狼之北橫河中以守賊也移

徙則兵起金火守之人相食外厨六星在柳南天子  
之外厨也占與天厨同弧南六星為天社在左人東  
南似柳直明則吉隋志云共工之子勾龍能平水土  
故祀以配社其精為星外厨之南一星曰天紀主知  
禽獸齒歲金火守之禽獸多死

兩朝天文志鬼四星距西南星去極六十九度半

耀四星距西北星去極六十度半入井宿二十九度

天狗七星距西星去極一百二度入井宿二十二

度 外厨六星距大星去極九十二度半入鬼宿二  
度 天社六星距西南星去極一百三十四度入井  
宿十二度 天紀一星去極一百一度半入柳宿五  
度

柳八星曲頭垂似柳近上三星號為酒享宴大酺五星  
守

柳十四度上為天之中道甘氏云主飲食倉庫酒醋  
之位明大則人豐酒食搖動則大人酒死失色則天



下不安饑饉流於道路不過三年必應張衡云柳為  
朱雀之喙天之厨宰也主尚食和滋味隋志云又主  
雷雨一曰天相一曰天庫一曰注又主木功星明大  
臣重慎國安厨食具注舉首王命興輔佐出星直天  
下謀伐其主就聚兵鬪國門酒旗三星在軒轅右角  
之南酒官之旗也主宴享飲食五星守酒旗天下大  
酺有酒肉財物之賜及爵宗室

兩朝天文志柳八星距西第三星去極八十二度半

酒旗三星距西北星去極七十七度入柳宿十四度

星七星如鉤柳下生星上十七軒轅形軒轅東頭四內平平下三箇名天相相下稷星橫五靈

七星七度甘氏云主后妃御女之位亦為賢士失色  
芒動則后妃死賢士誅明大則道化成國盛張衡云  
七星為朱鳥之頸一名天都主衣裳文繡隋志云主  
急兵守盜賊故欲明明則主道昌暗則賢良不處天

下空天子疾動則兵起離則易政日食兵饑婦人災  
木犯人安火犯旱金土水犯俱災月暈孛犯兵起軒  
轅十七星在七星北黃帝之神黃龍之體也后妃之  
主士女職也一曰東陵一曰權星主雷雨之神南大  
星女主也次北一星夫人也屏也上將也次北一星  
妃也次將也其次諸星皆次妃之屬也女主南小星  
女御也左一星少民少后宗也右一星大民太后宗  
也欲其色黃小而明也張衡云軒轅如龍之體主雷

雨之神後宮之象焉陰陽交合盛為雷激為電和為  
雨怒為風亂為霧凝為霜散為露聚為雲立為虹蜺  
離為背裔分為抱珥此乃十四變皆軒轅主之其星  
欬小而黃明則吉移徙則國人流逆東西角張而振  
后敗水火金守之女主惡也漢注曰軒轅為權太微  
為衡月五星守犯者如衡占內平四星在中台南燿  
之北平罪之官也明則刑罰平暗則否酒旗南三星  
曰天相丞相之象也其占與相星略同稷五星在七

星之南主農正也取乎百穀之長以為其號明大則  
歲大豐不明則儉不見則人相食

兩朝天文志星七星距大星去極九十六度 軒轅  
十七星距大星去極七十五度入張宿二度 內平  
四星距西星去極五十二度入張宿六度 天相三  
星距北星去極九十五度入星宿六度 天稷五星  
距大星去極一百三十七度入柳宿十三度

中興天文志石氏云中宮黃帝其精黃龍為軒轅首

枕星張尾掛柳井體映三台司四季司中獄司中土  
司黃河江漢淮濟之水司黃帝之子孫司保蟲三百  
六十按張衡靈憲蒼龍連蟠於左白虎猛據於右朱  
雀奮翼於前靈龜圈脊於後黃龍軒轅於中則是軒  
轅一星與蒼龍白虎朱雀元武四獸為五矣世之言  
星者惟知四獸而不知黃龍是求之未盡也孟康曰  
軒轅為權太微為衡以軒轅一曰權星故為權太微  
垣主理法平詞如衡之平故曰衡史記正義謂權四

星在軒轅尾西非也軒轅西四曰燿星主烽火脩警  
急不曰權也燿字從火誤為權字張守節不審指以  
釋此殊為踈繆

又曰或謂自有乾象便有此星軒轅果黃帝之神也  
有黃帝而後有之乎呂氏曰軒轅之星黃龍也兩角  
有軒轅之象故名之曰軒轅軒轅降神而生黃帝知  
之故自號曰軒轅云爾號軒轅非名也且如王良奚  
仲造父皆星名亦其神降而為人人去而復為星也

何獨於軒轅疑之

按軒轅本天市垣之星而在張宿之分野則南方  
朱鳥七宿之所司也三垣中外官諸星雖所掌有  
小大其位有尊卑而末有不隸於二十八宿者蓋  
二十八宿分布周天之躔度分野不可外也中興  
天文志據石氏星書以黃龍軒轅配四方二十八  
宿所謂青龍朱鳥元武白虎者分而為五而以為  
土德寄王鶉火夫五行之不可缺土土之寄王固



然矣遂以為燿積水積薪五諸侯天樽闕邱北河  
南河四瀆水位諸星皆為軒轅之屬按燿以下諸  
星與軒轅亦俱寄躔於二十八宿者也今欲尊軒  
轅而以諸星屬之則軒轅豈能外二十八宿而自  
為躔度分野以處諸星乎

張六星似軫在星傍張下只是有天廟十四之星冊四  
方長垣少微雖向上星數歌在太微傍天尊一星直上  
黃

張十七度甘氏云主天廟明堂御史之位上為天之  
中道若明大國則盛強失色宗廟不安明堂宮廢隋  
志云主珍寶宗廟所用及衣服又主天厨飲食賞賚  
之事星明則王者行五禮得天之中動則賞賚離徙  
天下有逆人就聚有兵金火守之有兵起或云主貢  
物色細無光王者少子孫日食虧修禮也月食大滂  
魚行人道火宇犯兵起土水犯國不寧張南十四星  
曰天廟天子祖廟也客星守之祠官有憂其占與虛

梁同長垣四星在少微南主界域及胡夷火守之胡人入中國太白入之九卿謀反少微四星在太微西南北列士大夫之位也一名處士亦天子副主或曰博士官一曰主衛掖門南第一星為處士第二星為議士第三星為隱士第四星為大夫明大而黃則賢士舉月五星犯守之處士女主憂宰相易

兩朝天文志張六星距西第二星去極一百二度半天廟十四星距西北星去極一百十三度半入柳

宿十三度 長垣四星距南星去極七十六度入張  
宿十四度 少微四星距東南大星去極六十五度  
半入張宿十五度半

翼二十二星大難識上五下五橫著行中心六箇恰似  
張更有六星在何處三三相連張畔附必若不能分處  
所更請向前看記取五箇黑星翼下頭欲知名字是東  
甌

翼十九度甘氏云主太微三公化道文籍失色則民

流日月交食五星並逆芒動則化道不行文籍壞滅  
動移則三公廢明大則化成隋志云翼為天之樂府  
主俳倡戲樂又主夷狄遠客負海之賓明大則禮樂  
興四夷來賓動則蠻夷使來離徙則天子舉兵或云  
明則禮樂興暗則政教失日食臣僭月食婦人憂五  
星孛流客犯大凶東甌五星在翼之南蠻夷星也張  
衡云主東越穿冑越三夷金火守之其地有兵芒角  
動移兵內叛

兩朝天文志翼二十二星距中央西第二星去極百  
四度 東甌五星距西南星去極一百二十九度入  
張宿七度

軫四星似張翼相近中央一箇長沙子左轄右轄附兩  
星軍門兩黃近翼是門下四箇土司空門東七烏青邛  
子青邛之下名器府器府之星三十二以上便為太微  
宮黃道向二看取是

軫十七度甘氏云軫七星主將軍樂府歌謠之事五

星犯之失位亡國女子主政人失業賊黨掠人禍生  
於百日内若明大則天下昌萬民康四海歸王張衡  
云軫為冢宰輔臣也主車騎明大則車騎用一云明  
大則車騎用一云明大則車騎動隋志云主載任有  
軍出入皆占於軫又主死喪明則車駕備動則車騎  
用離徙天子憂就聚兵大起軫轄星附軫兩傍主王  
侯右轄為王者同姓左轄為異姓星明兵大起遠軫  
凶軫轄舉南蠻侵張衡云轄不見國有大憂長沙一

星在軫之中主壽命也長沙明則人壽長子孫盛軍  
門二黃星在青邱西天子六軍之門也主營候豹尾  
威旗占以移其處為道不通土司空四黃星在軍門  
南主土功巫咸氏云金火犯之天下田不得耕女不  
得織隋志云一曰司徒主界域青邱七黑星在軫東  
南主東方三韓之國占與東甌同軫南三十二星曰  
器府主樂器之屬也明則樂器調理暗則有咎  
兩朝天文志軫四星距西北星去極一百三度半



右轄星去極一百一十度半入翼宿十六度半 左  
轄星去極一百一度半入軫宿五度 軍門二星距  
西南星去極一百一十二度半入翼宿十三度 土  
司空四星距南星去極一百二十度入翼宿十四度  
青邱七星距西北星去極一百二十四度半入軫  
宿五度 器府三十二星距西北星去極一百三十  
七度半入翼宿八度半

中興天文志總論曰甘石巫咸三家後代所宗也顧

或不深考以故三垣大角之列衛二十八舍內官外  
官之分隸不無異同今於三家參諸說考定二百九  
十座所以不知者闕如也蓋諸星有以一星為一座  
者有以二三十星為一座者有相為比附者有相比  
而不附者杠附華蓋凡十八星為一座衡附庫樓凡  
二十九星為一座也鉞不附井耳不附畢糠不附箕  
長沙不附軫鉤鈴鍵閉不附房則以屬吏自為官故  
也矢得以附弧白不得以附杵以弧矢一人司之杵

曰二人司之故也野雞不附軍市雞自守其所司也  
南門不附庫樓南門不但為庫樓門也他如積水不  
附天船積尸不附大陵天譏不附卷舌咸池天潢三  
淵不附五車石氏甘氏皆有其辨不可臆說也若夫  
稱名取類傳記錯見則又有不可概舉者北極為北  
辰水星為辰參為大辰而大火亦曰大辰宋大辰之  
墟是也見左氏昭十七年孫炎曰龍星明者以為時  
刻故曰大辰心在中最明時刻主焉元枵亦曰天龜

星在天鼃曼也見國語武王伐商星在天鼃昭十九  
年疏天鼃元枵別名也姬訾亦曰豕韋歲在豕韋是  
也見襄十八年疏豕韋亦名姬訾也鶉尾亦曰鳥帑  
以害鳥帑是也見襄二十八年裨竈曰歲棄其次而  
旅於明年之次以害鳥帑注南為朱鳥鳥尾曰帑疏  
曰人妻子為帑鳥尾曰帑妻子為人後鳥尾亦鳥之  
後故俱以帑為言也氐謂之天根見爾雅天根氐也  
郭璞曰角亢下繫於氐猶木之有根國語曰天根見

而水涸也室謂之定見爾雅云營室謂之定郭璞曰  
定正也作宮室以營室中為正詩定之方中作于楚  
宮昴謂之留見史記索隱曰留昴也而毛傳亦以留  
為昴也畢謂之濁見爾雅濁謂之畢也柳謂之味丁  
救反見襄九年味為鶉火疏曰柳謂之味味鳥口也  
若斯名類昉於堯典詳於爾雅左氏國語諸書而所  
入之度則未悉也若夫二十八舍諸言度分亦或差  
殊斗井度視諸舍為濶參僅一度古昏旦至觀弧建

為定亦由所見而莫著其度近世王奕所述十二次  
二十八度有可考焉

按史志言三家所考三垣大角之列衛二十八舍  
內外官之分隸不無異同今按歷代天文志惟宋  
兩朝及中興志與隋丹元子步天歌能言諸星之  
分隸然大角一星兩朝志以為屬亢中興志以為  
屬角庫樓十星丹元子以為屬角而兩朝志以為  
屬軫其為異同大概若此蓋自唐開元中一行所

造渾儀其所測宿度已與舊經異而宋太平興國中渾儀所測又與唐異所爭或一二度或三五度以管窺天豈能無誤於是此以為軫彼以為角甲以為氐乙以為房所差者常在裨鄰之次舍則亦不過三五度間耳天道幽遠術家各持一說固未有以訂其是非也至如南斗六星即斗牛之斗則其分野反在北方北斗天樞在張宿十度則其分野反在南方則其理有不可究詰者當俟知星者

而質之

二十八宿度

中興天文志王奕按自古言天者皆曰周天三百六十五度四分度之一何從而知審也曰天本無度因日之行一晝夜所躔濶狹強名曰度蓋日之行也三百六十五日之外又行四分日之一以一年而周於天焉以一日所行為一度故分為三百六十五度四分度之一范蔚宗謂日之所行在天成度在歷成日



是也曰天固有其度而二十八宿亦各有度何從而  
定之一也曰二十八宿亦未始有度也天體冲漠雖  
分為三百六十五度然其度難別也故作歷者隸其  
度於二十八宿用以紀日月所躔而已蓋天之有度  
也猶地之有里也二十八宿所分之度猶九州列縣  
所占之里也二十八宿各有其度則日之行於天也  
孟春在某星幾度仲春在某星幾度日躔可得而名  
也九州列縣各有其里則人之行於地也某日至某

州幾里某日至某縣幾里驛可得而計也此星度所  
由起也曰二十八宿之度或濶狹何也曰日之所躔  
偶與此宿相當此濶狹於是分也故說渾天者曰日  
之所躔或多或寡適當其星者凡二十八故度之多  
寡於是生焉井斗之舍非無星也然不與日躔相當  
故其度不得不濶觜鬼之傍非無星也然日躔一二  
日而其星適與相當故其度不得不狹也夫其得度  
濶狹非舉一宿全體盡占此度也南斗六星也舉全

體言之合距杓星為度而今歷家距魁第四星為度  
杓二星則入於箕牽牛六星也舉全體言之合距西  
二星為度今歷家距中二星為度而西二星則入於  
斗虛二星也舉全體言之合距北星為度而今歷家  
距南星為度北星則入於牽牛蓋南斗六星之中杓  
二星不當日之度而魁第四星當度故距於魁而得  
二十六度牽牛六星之中西星不當日之度而中二  
星當度故牽牛距魁而得六度虛二星之中北一星

不當日之度而南一星當度故虛距南星而得十度  
古之造歷假設是法以步日躔或者不察謂二十八  
宿本有其度又見某宿得幾度遂謂舉一宿全體在  
焉則又非矣又按唐志一行所謂虛北星舊圖入虛  
今測在須女九度危北星舊圖入危今測在虛六度  
半又奎誤距以西大星故壁損二度奎增二度今復  
距西南大星即奎壁各得本度又柳誤距以第四星  
今復用第三星張中央四星為朱鳥喙外二星為翼

北距以翼而不距以膺故張增二度半七星減二度  
半今復以膺為距則七星張合得半度吳興沈氏曰  
二十八宿為二十八星當度故立以為宿前世測候  
每或改變如唐書測得畢有十七度半觜只有半度  
之類皆繆說也星既不當度自不當為宿次自是渾  
儀度距疎密不等耳凡二十八宿度數皆以赤道為  
法推黃道有不合度者蓋黃道有斜有直故度數與  
赤道不等即復以當度星為宿惟虛度未有奇數自

是日之餘分厯家取於斗分者此也餘宿則不然

沈氏筆談曰予編校昭文書時預詳定渾天儀官

長問予二十八宿多者三十三度少者止一度如

此不均何也予對曰天事本無度推厯者無以寓

其數乃以日所行分天為三百六十五度有奇

日平

行三百六十五日有餘而一既分之必有物記之

其天故以一日為一度也

然後可窺而數於是以當度之星記之循黃道日

之所行一晷當者止二十八宿星而已

度如傘棹當度謂正

當傘檢上者故車蓋二十八弓以象二十八宿則如渾儀秦儀所謂度不可見可見者星也日月五星之所由有星焉當度之畫者凡二十有八謂之舍舍所以挈度所以生數也今所謂距度星者是也非不欲均也黃道所由當度之星止有此而已

按中興志所載王奕之說即沈括之說也王沈二公不知其孰先孰後孰倡孰襲然王說詳而明沈說簡而當故不嫌並著之云

文獻通考卷二百七十九